



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym

tiryimym@aolima

tir yimym

TAPAK 8

PM Modi-i Australia PM den linuk
ana tesendaktep atema jembi

Malaysia Masters: PV Sindhu
semi-final tongogo



VOL. XX NO. 224 (ADOK 224)

DIMAPUR

KÜPTOKNÜ (SATURDAY)

MONUPII (MAY) 27, 2023

₹ 5.00

All Ward Union Mkg-i non local hawkers azüoktsü ashir

Mokokchung, May 26, 2023 (TYO): Mokokchung town nung tzümartemi (non local hawkers) osettsüset tapu balala yoka kibong balala dangi kaoba ya tawa tanü kanga bulua kümdaki anungji iba mapa ya meita reprangtsü nüngdaka kümogo, ta All Ward Union Mokokchung Town (AWUMT)-i metetdaksü.

Iba tebilemsü dak sentakba nung AWUMT tir Limanungsang aser tongti zülur Jongpongtemjen nati Mokokchung Additional Deputy Commissioner & MMC Administrator dangi shidi ka zülüogo.

Memetetba tzümartem kuli

tejangja mekai iba ama tanen maka Mokokchung town tesem balala nung senzütepa den kibong shia dangi kaor ama kaoba ya lendong dang masü saka tim masüba mapa ka lir, ta AWUMT-i ashi.

Mokokchung town kübok 18 ward telongtet nung iba ama mejangjaba nisungtem yokshiyokra senzüba metetra tapet mera agitsü ta AWUMT Presidential Council 24th May, 2023 nü lemtetogo, anungji tamajung kecha matalokdang iba dak sentakba nung district keddangsurtemi tiyongtsü aittsüla ta AWUMT-isa shidi nung shia lir.

CERT-In-i phone virus tasen ka metetdaksür

New Delhi, May 26, 2023 (Agencies): 'Daam' ta ser Android malware kati mobile phones nung timtem agütsür aser call records, contacts, history & camera amala sensitive data telungi aiter ta national cyber security agency-i Hokolbarnü metetdaksüogo.

"Iba virus yagi anti-virus programs ajanger aser ransomware enoktsür" ta Indian Computer Emergency Response Team (CERT-In)-i ashi.

Android botnet ya third-party websites mesüra untrusted/unknown sources nungi applications download asüba ajanga belenshir, ta CERT-In-i ashi.

"Iba malware ya mobile phone telungi aitba sülen security check ajangdangtsü meranger

aser ibaji takok anguba sülenbo sensitive data auyar aser reading history & bookmarks amala temelaba angur" ta parnokisa metetdaksü.

'Daam' yagi phone call recordings, contacts, camera hack süteter, device passwords melenshir, SMSes auyar aser device nungi C2 (command-and-control) süteter anungji iba amala virus aser malware nungi jembua alitsüla ta CERT-In-isa metetdaksüogo.

Nisungtemi "un-trusted websites" mesüra "un-trusted links" mereprangtsüla. Ano mejangjaba emails aser SMSes melapoktsüla aser mobile phone nung anti-virus aser anti-spyware software update asütsüla ta parnokisa ashi.

Kuki lanurtemi defense force tenteter

Imphal, May 26, 2023 (Agencies): Kuki lanurtemi defense force tentetba osang metetdaksüogo.

Manipur kübok Kangoi subdivision nung aliba Kuki nungeri parnok yimtsüing

kümsüka ayutsü atema prangpong amshitsü lemtet.

Par ali kümsüka ayutsü atema lanurtemi defense force tentetogo aser parnoki Manipur sorkar nungi valid licenses anguba single barrel guns amer

Longsa Teka Pongen Ladongjungshi Semchir-i tenüngsang agütsür



Wb. Merenjungschi aser Wt. Opanngmenla na jabaso **Sb.Toshimanen-i** HSSLC 2023 tatidang nung Queen Mary Higher Secondary School, Mokokchung nungi Mathematics nung marks 100 nguteta Subject Topper in Mathematics jenjang ajangzüketba asoshi Longsa Teka Pongen Ladongjungshi Semchir-i tenüngsang tulu agütsür. Jabaso tejangraba aser nükjidong matong tashi pa azüngba wadang ajak nung Tsüngremi maneni moajangma ta sarasademtsür.

Asür Ahoa Konyak mang remogo; Tizit tensa süngjema akümer



May 26, 2023 nü Tizit nung asür Ahoa Konyak den asüpila sentep sentong agiba angur.

Kohima, May 26, 2023 (TYO): Hokolbarnü Tizit Area Students Union (TASU) indang Action Committee Chairman asür Ahoa Konyak den asüpila sentep sentong agir remogo.

Brihostibarne asür Ahoa Konyak-i anir par teloki Menshan Konyak'er ki mita reprangdang Menshan-i pa lempet.

Tanü telok balala nungi teshimtet nübotem, district administration keddangsurtem den nisung aikati asür Ahoa Konyak den asüpila sentep sentong nung aden.

TASU Office, Tizit Headquarters nung agiba sentong nung TASU general secretary Nokmao Konyak menden liasü.

Sentong nung DC & SP Mon, ADC Tizit, Konyak Union (KU) Mon Hq, Konyak Students Union (KSU) Mon Hq, Konyak Nyupuh Sheko Khong (KNSK) Mon Hq, KU Tizit unit, KNSK Tizit unit, TASU president, Nokyan village Angh, Nokyan Village Council, Nokyan Students' Union, Nokyan Union Tizit unit nungi lennirtemi o jembi.

Yashi asür Ahoa Konyak tepsetba sülen Tizit town nung tensa mejungi aküm saka tanü iba sentong agiba sülen tensa süngjema kümogo.

TASU-i yashi nungi dokan ajak shibangtsü tenokdangba agütsüba tanü tashi liogo.

"TASU-i onük pungu takhangba agütsüba mulunga agizükogo aser iba ajanga tensa süngjemogo" ta TASU president Yanphong Konyak-i ashi.

Iba takhangba shidi nung Nokyan Chief Angh Hanglongwangham, Nokyan Village Council chairman Tingkam Konyak, Nokyan Citizen Forum president C. Ayan Konyak, Nokyan Students' Union president Nyempha konyak aser Nokyan Union Tizit Tahphia Konyak nungeria sign süa lir.

Konyak nunger sobaliba nung aliba ama Menshan Konyak nung par kibong Tizit Town kübok Pentom ward nungi meindoktsüla ta TASU-i akhanger.

Parnokisa iba lendong atalokba tesem "Ahoa Martyr Park" ta wazüka ayutsü aser park nung nüngshilung ka yanglutsü akhanger.

Kümshia May 25 nü "Martyr's Day" ta ser amongtsü aser asür Ahoa-i mapa tajung inyakkang pa taküm bendanga agütsüba teti bilemtetsü aser tushitsü TASU-isa akhanger.

TASU-i bangdakpur dang nungi asür Ahoa atema teyari meshitsü aser aibelensang ozüing tapet agi merenshitsüla ta parnokisa metetdaksü.

Yasüing TASU-i KU Mon Hq, KSU Mon Hq, KU Tizit Unit,

Nokyan Village Council, Nokyan Citizen Forum nunger lia senden ka amendang Menshan Konyak'er kibong Pentom Ward, Tizit town nungi teti atema meindoktsü bangjemtepa liasü.

Parnokisa Menshan Konyak'er kimung TASU Martyr Park ama wazüka ayutsü aser TASU o KU Tizit Unit ajanga Administration dang Menshan Konyak nungi martyr's park atema site permit transfer asütsü mapa inyakttsü lemtet.

Iba tatalokba nung aibelensang nem temerenshi tulutiba agütsütsü atema TASU-i tanga teloktem den külemi temeten atema inyakttsü senden nungsa lemtetogo.

ENWO-i aitsür: Külen, Eastern Nagaland Women Organisation (ENWO)-ia iba tatalokba atema jashiba aser temulung raksaba metetdaksüogo.

Menshan Konyak-i taochi maliba aser tesempatsü mapa inyakba khukhuma aitsür aser sorkar dang Nagaland nung yi o mozü timtem atema mapa inyakttsü takhangba agütsür ta ENWO-i ashi.

Ozüing amertemi aibelener nem tapet temerenshi agütsütsüla aser taochi mesayutsüla, ta parnoki ashi.

Asür Ahoa Konyak nem temeten agütsütsüla aser par kibong den mangyim lemsateper, ta ENWO-isa metetdaksüogo.

Manipur MLA 14-i Amit Shah den ajurutep

Guwahati, May 26, 2023 (Agencies): Manipur nungi MLA 14-i May 25 aonung Guwahati nung Union Home Minister Amit Shah den ajurutepa liasü.

Amit Shah-i May 29 nü Manipur semdanga anogo asemnü amongtsü sentong lir.

Yasüing Manipur Speaker Th Satyabrata, minister Awangbou Newmai, minister Dr Sapam Ranjan Singh, minister H Dingo aser minister Sushindro Yaima nungeri Amit Shah den ajurutep.

Iba ya party ajak adenba telok ka liasü aser BJP MLA 10 den National People's Party (NPP) o Naga People's Front (NPF) nungi MLA anana aden.

Koinadhara Guest House No 1 nung minute 40 shi senden amen aser idangji Union Home Minister-i Manipur MLA temi ashiba kanga junga anga.

Senden nung Manipur MLA temi Amit Shah dang Suspension of Operation (SoO) kübok aliba telungpur teloktem dak mapa inyakttsü ayongzük.

Parnokisa Manipur nung

international border atsüandangtsü aser National Register of Citizens (NRC) yanglutsü mepishia liasü.

Tangalen nungi arrtsü adena prangpong-injangtem bener aruba ajanga Manipur nung ozüing alema mapa inyaksangshir, ta Manipur MLA temisa Amit Shah dang ashi.

Manipur state sorkari poppy lu ayimba anema mapa inyakba ajanga kongshiba telok anati tawa tensa raksatsü ta NPF MLA temia ashi.

May 29 nü pai Manipur-i marudang Manipur nung Imphal Valley aser hills nung aliba telungpur teloktem azüoktsü atema mapa inyakttsü ta Union Home Minister-i ashi.

Paisa MLA tem dang kin ajak nungi nübertem tesüiba amadoktsü aser kati ka den aremzükteptsü atema mesüzükang ta ashi.

Meitei nungeri temeim sayutsüla kechiyong Meitei nunger nütsüing yongzük teimba lir ta Amit Shah-isa ashi.

NRC mapa inyakttsüba ya tang mapang shitak masü kechiyong

mezüngbuba nung Manipur nung yimjung bener arutsüla, ta paisa shisem.

Meitei aser Kuki nungeri state nung yimjung bener arutsü atema olemteptsüsa Chief Minister N. Biren Singh-i mapa inyakttsüla, ta paisa metetdaksü.

Pei pei constituency nung aliba Meitei nungeri parnok ashioktsüba ama bilemer anungji onoki MLA menden yutsütsü rongshir, ta BJP MLA temi Amit Shah dang ashi.

Centre sorkari SoO teloktem anema mapa meinyakba atema Meitei nungeri mepelar ta parnokisa ashi.

"Centre aser state nung BJP sorkartem lir saka onoki Centre dang Meitei nunger taginüba kümsüka ayutsü mejembitetba agi nübertemi onok anentsü rongshir" ta BJP MLA temisa ashi.

"Imphal Valley nungi nisungtemi tawa minister ki ana makogo. Nübertemi tensa süngjema mengura aser tensa kasa dang lira onoki MLA menden nungi anentsüsa akümtsü" ta BJP MLA temi Amit Shah dang ashi.

Advisor Moatoshi Longkumer-i district balala sema jaja



Advisor, L&ESDE and Excise, Moatoshi Longkumer aser ketdangsür temi May 22, 2023 nü Peren, Chümoukedima aser Dimapur district tem sema jajaba mapang tangokba noksa ka yangi angur.

Dimapur, Monupii/May 26 (TYO): State nung Industrial Training Institutes aser Employment Exchanges tem asadangsü asoshi Advisor, Labour & Employment, Skill Development & Entrepreneurship, and Excise, Moatoshi Longkumer-i district tem sema jaja liasü.

Item establishment tem inyakyim nung metokmeperi mesüra sempet tem jangjatetsü nükjidong nung iba sentong ya agia liasü.

May 22, 2023 nü MLA Moatoshi Longkumer den Additional Secretary and Ex-Officio Director of ESDE, Kovi Meyase aser Department

nungi ketdangsür temi Peren, Chümoukedima aser Dimapur district tem sema jaja.

Iba mapang MLA Moatoshi Longkumer-i item district tem nung ITIs tem semdanga District Employment Exchange aser Rural Employment Bureau aser ITIs indang principal aser instructor tem ama tongtipang nisungtem den sensaksema liasü.

Advisor ajanga tesem kar nung temelenshi nüngdakba angateta liasü, talisa ki o jen aser training agütsüba nung temolung masüba nguteta liasü.

Item reju nung training agia aliba kaketshir mapang anguba tsütsü lenmang

ulushitsü asoshi mera balala agütsü atema pai jembia liasü.

State nung skill development aser employment tsütsü lenmang tali adokdaksütsü sorkar nükjidong nung shilem ka ama Advisor Moatoshi-i district tem sema jajar.

Pai taruba hopta nunga state kübok tesem balala nung aliba ITIs aser Employment Exchanges tem semdangsü.

Item tesem semdangba mapang angazükba nung ajemdaker state nung skilling ecosystem aser takum alitsü asoshi maongka tajungba nung agütsütsü atema sentongtem yanglutsü.

CHSS Dimapur nungi HSLC & HSSLC Topper tem tushi



Dimapur, Monupii/May 26 (TYO): Christian Higher Secondary School, Dimapur nungi HSLC aser HSSLC examination 2023 nung tematiba jenjang nguteter nem tetushi agütsüba sentong ka school administration ajanga May 26, 2023 nü ayongzüka liasü.

Iba sentong ya Covenant Hall nung agia liasü, kong tematiba jenjang ngutetba kaketshirtem, parnok tsürabor, administrative heads, tesayur aser tang Class 10 aser 12 nung tezüngdak kaketshirtem dena liasü.

Christian Higher Secondary School, Dimapur nungi HSSLC examination 2023 nung tematiba jenjang nguteter temji Zahid Ahmed Laskar (1st Rank Com.), Fiza Khanom Barbhuiya

(2nd Rank Com.), David Shyam (9th Rank Com.), Bodeno Chüsi (3rd Rank Arts.), Sangpila Sangtam (7th Rank Arts.) alitsü aser HSLC examination 2023 nung tematiba jenjang nung takok angur Awantika Kumari (5th Rank) aser Epirhoni N Jami (18th Rank) alitsü.

Kasa mapang CHSS Dimapur nungi Subject Topper temji Zahid Ahmed Laskar (B.Studies, ENT & FBM), Fiza Khanom Barbhuiya (Eco., FBM), Bodeno Chüsi (History), Sangpila Sangtam (History/Sociology), Abhida Begum Talukdar (FBM), Alovi Yeptho (FBM), Anmol Kumari (FBM), Ayush Tunwal (FBM), David Shyam (FBM), Deep Chand (FBM), Imlimenla L Jamir (FBM), Proyash Sarkar (ENT),

Ravi Kumar (FBM), Sarimul Hoque (FBM), Awantika Kumari (Social Studies), Epironi N Jami (Social Studies), Lanusanen Imchen (Social Studies) aser Liana Aye (Social Studies) alitsü.

Iba sentong nung school Chaplain Jolly Jami menden liasü aser tesayur Keneichutuöü-i sarasadem.

School principal ajanga takok angur nem tenüngsang agütsü jembia aser tang Class 10 aser 12 nung azünger dang pei nükjidong atongtsü asoshi meranga azüngtsü ayongzüka liasü.

Kasa sentong nung School Managing Board züngsem Toshi Sangtam-i school ketdangsür aser tesayurtem dang pelaba lemsatepa liasü.

Nagaland Board of School Education ajanga metetdaksür

Dimapur, Monupii/May 26 (TYO): Nagaland University ajanga taoba mapang züluba shiti ama aser iba Office ajanga June 15, 2022 nung sangdongba ama University Grand Commission (UGC) ajanga temelenshi bener aruba ama Choice Based Credit System (CBCS) kübok B.A. Economics (Honours) nung admission agütsü atema janra aliba kaketshirtem Higher Secondary level nung Mathematics ya subject ka asütsü Higher Secondary School tem dang nenshia metetdaksür, ta Nagaland Board of School Education (NBSE) sangdong ka ajanga ashi.

Iba policy ya Nagaland University aser linük tesem ajunga nung aliba danga

University nunga amshitsü. Anungji Higher Secondary School tem koba nungsa Economics subject ya elective subject ama agütsür, item Heads of Higher Secondary Schools temi educational ecosystem nung temelenshi metettsüla aser tarutsü nung B.A. Economics (Honours) azüngtsü janra aliba kaketshir indang maongka magütsü mayutsüsa nüngdakba mera agütsü ajungshir, ta sangdong ajanga ashi.

Heads of institutions temi iba osang ya prokshitsü aser admission mapang kaketshir nem angatetdakja tetenzükdang parnok subject combination shidak shimba nung yaritsü ayongzüker, ta sangdong ajangasa ashi.

TASU lenir Ahoa Konyak tepsetba aitsür

Dimapur, Monupii/May 26 (TYO): Bresthostibarnep Mon District kübok Tizit nung TASU lenir Ahoa Konyak tepsetba khukhua aitsür. Iba mapa tamajung agi kü molung raksar, ta Dy. CM, T.R Zeliang ajanga asangdong ka nung ashi.

Bushisüngdang den ajaki tashi angateptsü ayongzüker aser tetsübo makai tajungtiba nung bushisüngdanga tekeratiba nung ochi obendang agütsütsü amanger, ta pai ashi.

Mangyimer kibong den asükhü lemsateper aser parnok nem Tsüngremi anisüngzüker aser tasü tait molungsentsü agüjang ta sarasademtsür. Asür tanüla teti tatem maka tesunep nung anisüngzükerjangma, ta paisa ashi.

Namsa Tizit nung May 25, 2023 nü duty inyakba mapang temesepba mozü shibelena ayoker kati Tizit Area Students' Union (TASU) indang Action Committee

chairman, Ahoa Konyak tepsetba osang angazüka tejashi lemsateper, ta All Zeliangrong Students' Union Assam, Manipur and Nagaland (AZSU-AMN) sangdong ka ajanga ashi.

Lokti tentet ajaki pei jurisdiction nung tapet naoa inyaktsü temeden lir, koba aika atema tepelatsü masütsü saka ibaji ajanga duty inyaker tepsettsü shinga nema tashi magütsür, ta parnoki ashi.

Bendanga agütsüba lenir ka takum samatsüsa atalokba lendong asoshi süoki ia bilemstür aser aitsür, aser ozüng amshirtem dang aibelener nem memonui tapet obendang agütsütsü ajungshir, ta AZSU-AMN ajanga ashi.

Office ajanga mangyimer kibong den asükhü lemsateper aser TASU ajanga temesepba mozü anema raraba mapa tajung atema akhum agütsür, ta sangdong ajangasa ashi.

Dimapur Police-i mapa tamajung inyaker ana apu

Dimapur, Monupii/May 26 (TYO): Mejangjaba nisung kari amokmerenba, tashiyim amshia sen meshiba aser merenshiba den ano May 3, 2023 nü mejangjaba nisungi ango indang boxes 34 telung nung temang asoshi mozü tamajung inoktsü, ta Andhra Fish Supply Union indang tir nungi tezüluba nung May 3, 2023 nü Sub-Urban Police Station, Dimapur nem agütsü liasü. Iba dak ajemdaker bushisüngdangtsü atema ken o ka Sub-Urban Police Station nung benoka liasü, ta sangdong ka ajanga ashi.

Bushisüngdangba mapang temolung melemteti aliba nisung kar jangjateta police temi mita liasü. May 26, 2023 anepdang 1:00 ako meta ACP West den OC SBN PS, 2nd OC SBN PS aser SBN PS team ka Kohima

leni atu aser electronic surveillance aser nisung temi itdangiterba nung ajemdaker New Minister's Hill, Kohima nung ki ka mita aoba mapang nisung ana apu.

Tena ya Apuloto Chishi (36 yrs), SS Lieutenant Colonel NSCN K (Khango) Kohima Town Commander aser Kaisha Yepthomi (30 yrs) SS 2nd Lieutenant NSCN K (Khango) liasü aser tena ket nungi 9 mm Berreta ka den injang 42, sen 10,000, extortion slips 17 den mapa tamajung inyakdang amshiba kuli kaketshirtem nguteta liasü.

Kasa mapang mapa tamajung inyakdang amshiba gari Alto K10 LXI ka ngutet. Nisung ana ya SBN PS nung police ket nung lir, ta sangdong ajanga ashi.

GOVERNMENT OF NAGALAND
DIRECTORATE OF HEALTH & FAMILY WELFARE
 NAGALAND: KOHIMA

No. DHFW-5-23/TRG-NSG/2022/2497-01 Dated, Kohima the 26th May 2023.

ADVERTISEMENT

As per Administrative approval Vide No. HW(A)-12/72/2018/287 Dated, Kohima the 5th May 2023, interested candidates from bonafide Indigenous Inhabitants of the State of Nagaland are hereby invited to undergo Training in General Nursing & Midwifery (GNM) and Female Health Worker (FHW) for the session 2023-2024 for the 4 (Four) Schools of Nursing in Nagaland as indicated below.

1. Minimum and maximum age for admission will be 17-25 years on or before 1st January 2023.
 2. Application Form duly filled up along with necessary documents duly self attested may be submitted along with the Schedule Tribe and Indigenous Inhabitant Certificate which is compulsory for all while submitting the form.
 3. No separate calling letter will be issued.
 4. Issue of **Application Form 1st to 7th June, 2023**
 5. Last Date of **Submission of Form 9th June 2023**
 6. Issue of **Admit cards 9th and 10th August, 2023**
 7. Course details-
 - A. **(GNM) (School of Nursing, NHAK, IMDH Mokokchung, D.H. Dimapur)**
 - i. For unmarried Male / Female candidates
 - ii. 3 (Three) years course, 100 (one hundred) seats.
* Kohima-20 seats, *Mokokchung-40, *Dimapur-40 seats
 - iii. Qualification –
 - (a) Class 12 passed in any stream with 45%.
 - (b) The ratio of Seats for science is 70% and other Streams is 30%
 - B. **(FHW) (School of Nursing, D.H. Tuensang)**
 - i. For unmarried Female candidates only.
 - ii. Two years course, 30 (Thirty) seats.
 - iii. Qualification:
Class 12 passed in any stream with 40% from recognized English medium School Board, 45% from Recognized National Institute of Open School.
 8. There will be written and viva test (Dates will be notified later)
 9. No Government job is assured after completion of Training.
 10. Incomplete Application, if submitted will be rejected summarily. List of rejected application will be published in the Office Notice Board.
- * Backward Tribe Reservation Policy (15%) will be followed as per Govt. Notification No.HTE/RESEV/23-1/2012 Dated, Kohima, the 30th May, 2016.
- * Person with Disability (PWD) may also apply for GNM and FHW under the Categories, DW-Dwarfism/LC-Leprosy cured/AAV-Acid Attack Victims.
- Application Form will be available during office hours at the Directorate of Health & Family Welfare (Room no-210) at the cost of Rs. 200/- (two hundred) only.

(DR. VIBITUONUO M. SACHU)

Principal Director
 Directorate of Health & Family Welfare
 Nagaland: Kohima.

GOVERNMENT OF NAGALAND
 OFFICE OF THE MEDICAL SUPERINTENDENT
 DOCTOR IMKONGLIBA MEMORIAL DISTRICT HOSPITAL
 MOKOKCHUNG: NAGALAND

NO MS/MKG-5/ Advmt-1 /2019-20/202

/DT. MKG. THE 25th MAY 2023

ADVERTISEMENT

Application are invited for interested & eligible candidates for walk-in-interview for 4 (Four) post of Staff Nurse in the ICU of the District Hospital IMDH.

1. On Contractual basis for a period of (One) year (w.e.f 1st June 2023 to 31st May 2024). The contractual service is extendable on yearly based performance.
2. The remuneration shall be at Rs 15,000/- (Fifteen Thousand) per month during the period of support.
3. The details of the Recruitment Process, Eligibility Criteria & application form can be downloaded from the Department Website-<https://nagahealth.nagaland.gov.in>.
4. Last date of submission of application will be 29th May 2023 to Medical Superintendent, IMDH.
5. Date of interview will be 30 of May at 1:00 PM at the Office of Medical Superintendent IMDH.

RECRUITMENT PROSESS AND ELIGIBILITY CRITERIA

1. **Eligibility Criteria:**
 - a. Qualification - B.Sc Nursing/ GNM - from recognized institute approved by the Indian Nursing Council.
 - b. Age limits - 18 years to 35 years.
2. Application form to be filled by the candidate with all relevant documents which are attested to be submitted to the office or the Medical Superintendent on or before date.
3. The applicants will be called for interview on the appointed date after scrutiny of the documents.
4. If the candidate is employed elsewhere, the candidate should bring a "NO OBJECTION CERTIFICATE" from the employer.
5. The applicant should bring all relevant documents in original at the interview on the appointment date.
6. The selection of the candidate based on Walk-in Interview shall be carried out by the Hospital Recruitment Board after the verification and scrutiny of the documents.
7. Preference shall be given to those candidates hailing from the same district, as placement and posting shall be in the respective district hospital ICU.
8. On being selected, the candidate will report to the office of the Medical Superintendent of the respective district hospital for orientation and duty assignment.
9. This advertisement is based on M.O.U signed between Directorate of Health & Family Welfare and the eGovernments Foundation for implementation of the 10 bed ICU project in Nagaland.

DR. S. MARINA YADEN
 Medical Superintendent

Dr.Imkongliba Memorial District Hospital
 Mokokchung.

Congress-i Ato kilonser Modi dang tasüngdangba 9 asüngdang

New Delhi, Monupii/May 26 (Agencies): Ato kilonser Narendra Modi-i aniba sorkar küm 9 ajungba mapang nung Congress Party-i sorkar dang tasüngdangba 9 asüngdangogo. Ajisüaka osangbenertem senden ka nung BJP MP, Ravi Shankar Prasad-i, item tasüngdangbatem ya Congress-i Ato kilonser, Narendra Modi sempapa agi lir, ta aitsü.

Congress-i Ato kilonser Modi dang osettsüset jengang atuba, mapa manguba tebilemstü tuluba akümba aser aluyimertem income densema lenla balala nung tasüngdangba 9 asüngdangba den külemi pa Ato kilonser inyakba mapang nung ashioksüba atema tatok meshitsüla, ta takhangba agütsü.

Sorcial media ajanga 'küm 9, tasüngdangba 9' ta ser Congress lenir Rahul Gandhi-i, BJP-i tiyazü tenangzükbatem ajanga nüburtem timtemdakja küm 9 building yanglu, ta aitsü. Congress-i, "Kechiba India

nung osettsüset jengang kanga atur aser mapa manguba tebilemstü tuluba akümer? Kechiba takartem takarba dang akümdang sensakertembo tesensakba dang akümer? Rongsenketsüing takoksa tuluba dang akümdang kechiba public kiojen Ato kilonser Modi'er medemertem dang ayoker?" ta asüngdang.

Aluyimertem dak sendakba nung Congress-i, "Kechiba aluyimba ozüing tasen asem agiendang aluyimertem dang nangzükbatem mapa küma meinyaker aser kechiba minimum support price (MSP) magütsür. Kechiba Modi sorkari nangzükbata ama tesüiba küm 9 tsüngda aluyimertem income anasü agi tali maküm,?" ta asüngdang.

Congress-i, kechiba Ato kilonseri nüburtemi kanga meranga aazüker LIC aser SBI nung rizüngba sen nungi tajangzükbate par medemer Adani nem agüja nüburtem timtemi yoker, ta asüngdang.

"Kechiba nai auertem jendaktsür? BJP-i yimsüsüba state tem nung ochimashi jenti liaka nai kechiba ola madoker aser kechiba India nungertem timtemdaktsür," ta Congress-i asüngdang.

Linük security dak sendakba nung Congress-i, "2020 küm nai China maitsü, ajisüaka kechiba parnoki maneni India nungertem li atsünger?" ta asüngdang.

"Tetsürtem, Dalit nungertem, SC, ST, OBCs aser minorities anema inyakba atema kechiba nai ola madoker? Kechiba caste census agitsü atema akhangba nai sendoka yutsür," ta asüngdang.

"Coronavirus ajanga nisung lakh 40 dak tema süogo, saka kechiba Modi sorkari item kibongtem nem teyari agütsütsü memelunger? Aayanger lakh aika pei kidangi meyipa aotsüsa kechiba nai ajungbena lockdown benok aser kechiba parnok meyari,?" ta Congress-i asüngdang.

PM Modi-i Australia PM den linük ana tesendaktep atema jembia



India aser Australia nati Economic Cooperation Trade Agreement (ECTA) tezüngzüktep agi aser maneni Comprehensive Economic Cooperation Agreement (CECA) tezüngzüktep agitsü atema inyakdar.

Modi aser Albanese

Sydney, May 26 (Agencies): Australia semdangba mapang India Ato kilonser, Narendra Modi-i Australia Ato kilonser, Anthony Albanese den senden amending linük ana tsüngda shishilembaba, defence aser renewable energy tsütsü tesendaktep tajungba akümtsü atema jembio.

Mongolbarnü Sydney nung Ato kilonser Narendra Modi-i Australia nung alir India nungertem den jembia liasü, iba sentong nungji Albanese-a aden.

Yaküm December ita nung

nati linük ana tsüngda nüburtem tesendaktep tashi itshitsü, renewable energy, defence aser security tsütsü amalitepa inyaktsü atema jembia.

2020 küm June ita nung India aser Australia nati asalentong tsütsü partnership yanglua liasü aser linük ana tsüngda military base amshitsü bangjema liasü.

Yaküm August ita nung Indian Air Force indang Sukhoi-30 MKI fighter jets pezü aser C-17 heavy-lift aircraft ana amshia Australia nung linük 17 air combat exercise nung shilem agia liasü.



TIR YIMYIM YIMOBILEM (EDITORIAL)

DIMAPUR

KÜPTOKNÜ

MONUPII 27, 2023

Pei tata shilem meinyakba takoksa

Y akanü Tizit nung kaketshirtemi ozüngi memelaba mozümora ayokertem mita aodang, mozü ayoker südi ta parnok temulung melemi bilema ki ka mitba mapang, iba ki kibur jagiang meyiper parnok lenir lepsetba lendongji taoksatsüka, tesasatsüka aser tejashitsüka lir. Ano, iba sülen tejashi marem teloki nisung lepsetsanger ki rongdoktsübajia meimlaba takoksa lendong tuluka atalokogo. Iba lendong yagi asenok ajak aitsür aser asenok ajak nem ozüng raksaba mapatem nungi pei nübortem kümzüka ayutsü asoshi khuret aser teinyaktsü nenshia metetdaksür. Ashi asenok tsüraburtemia pei kibong nung pei chirnurtem mozümora achir aser ayokertem mekümi ozüng kübok litetba senso tajung ka küma aientsüsa sayutet asübo, Tizit lendong ya matalokla. Aji oda, arogo nung, talisa, asenok tenzükertemi tanurtem sentep aser Sunday school nung tali temulung agüja kibong shia nung Tsüngremi moatsüba tanurtem parnok aotsüba len shitaki aotsüsa anitet asübo, Tizit lendong ya kodanga mataloktsü. Kasaji, asenok tesayurtemi school nung asen jakla yimya aser libaliro tajung agi tanurtem dang mozümora achiba tatidang koktettsüsa tangatetba tashi ka parnok kolok aser mulungjang nung enoktsütet asübo, tanü Tizit tashi nung mozümora ayokba aser achiba nungi adokba lendong pateka ya matalokla. Atangji, teloki tema nungi reprangtsü agibo mozü achir aser mozü ayokerji tai, ajisüka parnok aitsüba jagi mozümora tebilemtsü akoker masü saka shitakba tebilemtsü tenzükakang miimbanga yutsür. Aji oda, tebilemtsü shitakbajibo kodaser parnokji mozü lar aküm ? Aser kodaser parnokbo ozüngi memelaba yi aser mozümoratemang yoka kibong mesür ? ta asüba kulitemjiang asütsü. Nisung shia taküm nung item tebilemtsü tenzükba anogo aser mapangji asüngdangtepa odangra, itemji kenü kibong nung tsüraburi o tajung ka agi matongba agi mesüra kaketreju nung tesayurtemi kenü temulung magütsüba agi mesüra arogo nung tanurtem tongtibangsa mamshiba agi mesüra government nung teinyaktsü purtemi pei lima aser nübortem meima shitak metenzükba ajanga pei chirnurtem dena taküm sosadaksüba mapatem asütsü. Government shitak aliba lima ka nungbo ozüngi memelaba mapa inyaker mesüra mozümora ayokertem mittsübajii kaketshirtemi mapa masü mesüra nübortemi ayongdener inyaktsüba mapa ka masü. Item mapa atemaji government sen endoka department balaka lapoka lir aser iba department kübok yi aser mozümora mittsü aser nokdangtsü asoshi ita sen dalang agütsür inyakertem yua lir. Government-i parnok inyakertem nem agütsüba senji nübortemi pei pei mapa nungi alimelen (tax) agütsüba sen lir. Asenoki government-i ita sen aser terenlok mapatem nung endokba sen ya government-i dang pei menügnütsü menünga lemetsür amai bilemer. Ajisüka, yamaji kodanga masü. Government nung alirtemi pei menügnütsü menünga sen amshi nungbo senji sen masü akümstsü. Aji Muhamad bin Tughluq yimsüsüba mapang kibong ajak nung sen atsüng tenzükba amai dang asütsü. Aji oda, asenoki angatetsü agi arogoi amshiba sen ya arogoi menüngba sen masü saka arogo züngsemtemi pei pei inyakba nungi tenla (alimelen) agütsüba sen lir. Atangji aji Tsüngrem nem agütsür, saka asenoki Tsüngrem mangur anungji nübortem ajungtsü asoshi amshir. Iba kasaji government-i ita sen agütsüba aser terenlok mapatem atema endokba sen ajakji nübortemi tax agütsüba sen amshir. Ibaji mangatetba agi, asenoki ita sen yabo angati sen amai bilemer aser ita sen achirtemi mapa shitak meinyakyonga asenok kecha takoksa mangur amai bilemer. Ajisüka, government nung ita sen shitak angurtemia pei tata mapa meteta shitak inyak asübo, Tizit lendong ya matalokla. Item ama lendong aser takoksa anguba ya teinyaktsü pur kati mapa shitak meinyakba ajanga tangar akoksadaksür. Item ama aseni asen mapa shitak meinyakba ajanga tesama aser takoksa ajuruba mapatem aika lir. Asenok züzüa lira asenok kibong nunga kasa lendong ataloktsü menua maka. Joko, tasüsangjibo meyipa marutsü saka pa taküm tenlaji Nagalang asoshi sentisa züngshitsüba otsü ka asütsü. Iba ama taküm tenlaji government-ia reprangtettsüla aser tarutsü nung iba ama lendong mataloktsüsa ita sen achir machir ajaki pei teinyaktsü mapa meteta shitak inyaktsüla.

OLEMSABANG

Tsüraburtemi chirnur atema khuret abentsüla aser mapang peria agütsütsüla

L. Kika Pongener

(Yashi adok nungi...)

Ano tsürabur aikati chirnur dang mapa inyaktsü mesayur. Talisa, ayir chanu aika nubojung/jung tain kümer sernung sorochoktsü mashi, sungo yanglutsü mashi, suoshi shitoktsü mashi aser ki mapa inyaktsü mashiba aika lir. Ibaji tetsü kati pei teinyaktsü mapa shidak meinyakba tamakok tulutiba ka asütsü. Tetsür taküm kaji kechi komar'ka degree tulu züngaka, office nung tulur menden nung menaka kidangbo kinungtsüsa asütsü. Anungji kidang teinyaktsü mapaji-bo laisa inyaktsü. Tetsü kati pei jalatem dang item mapaji mesayura, lar jalatem kiba-kiyi orr tebur den alidang maaksu ajurutsü, aser aji tanür tai masü tetsü ka tai asütsü. Tetsür kati kilung nung pei teinyaktsü mapa mashibaji konang-nungsang ka masü saka maaksua ta metettsüla. Kechi komala kibong ka sudir suang, takar-tulur 'Royal Family' kibong amala nung-ia suang, sensaker kibong ka nungia suang, saka tetsür kati tetsür mapa metettsüla aser tebur nubojung/asangur kati tebur mapa metettsüla. Tanü putu nung kibong nung mapa tamKinungtsür aikati kilir lir ta sur, choka nung sorochioktsü mapa ajunga kilir nem dang shiloka toktsüba agi kibong aika rongsenketzung nung sensak tiai ayir, kechiyong kilir jagi kecha tapayu meli-i lalushiponga dang, oda nangnanga jangradema chiyungtsüba asa-a dang awazüa sorochioktsü.

Ano chirnur bendang lima talang nung oa azüngertem, Assam-India lima yimti tulu nung nung oa azüngertem koma züngdar (?) Koda lidar (?) College/Institution-i shidak aor asü maor (?) Item ajakji kanga junga bushitsüngdanga metettsü kanga tongtipang lir. Item osangji kong nungi kodaser metettsü ta sura, Institution shia nung Students Union tanishir lir aser City shia nung Fellowship lapoka lir, anungji Fellowship nung Pastor/Chaplain den tongtepratepa metet-pelatsü akok. Ano kanga tekümdangtsü kaji, tanü putu nung India lima City aika nung 'Taila University & Taila Colleges' (Fake universities & Fake colleges) aika lir. Anungji item ajakji kanga junga meteter dang züngdaktsütsüla. Ano kaketshir ayir-asangurtem aika apuani amai, ki ka nung külemi sentepa alir-a karbo lir. Ano karbo college/institution toktsür sadok-sadoka alir-a alitsü akok. Tsürabur-bo timtema itashia senotsü bener yoker, saka tanürbo college/institution toktsür amajok nung aliba karbo alitsü akok. Ano karbo medemer tamajung ajurur yi-lar/mozü-lar kümer taküm lisa-a alira karbo alitsü akok. Ano kanga tekümdangtsü kaji, aiur chanu karbo Company nung mapa tajung inyaktsü ta ser anir orr 'Hotel' nung mapa tamajung khangshia inyakdaksüba-a karbo alitsü akok, ano karbo mapa atema kecha teimla maliba agi pei sasa mulunga inyakera alitsü akok. Anungji tsürabur ajaki chirnur atema khuret kanga abentsüla aser chirnur nem mapang peria agütsütsüla. Rongsen aika benden-aka chirnur taküm tia raksadaktsüra rongsen ajungaji anak-aoyi akümstsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

World Help-i N Korea nung Khristantem dangi Laishiba yoker



World Help Tir, Noel Brewer Yeatts aser tebu, Vernon Brewer na noksa nung angur.

May 26, 2023: Khristan organization 'World Help' teloki alima nung Khristantem tamajungtiba reshikangshiba linük, North Korea nung Khristantem dangi chiyungtsü den külemi Laishiba jenti yoker.

North Korea nung Kim Jong Un yimsüsüba kübok Khristantem labor camps-i yoker, reshikangshir aser tepseter.

1991 küm World Help tentetba mapang nungi parnoki China aser Russia dangi Laishiba aika yokogo. 2006 küm nungi tenzüka World Help teloki partners teyari ajanga North Korea nungertem dangi Laishiba aika yokogo.

Interview ka nung jembidang World Help Tir, Noel Brewer Yeatts-i, reshikangshi tia nung aliba Khristantem dangi Laishiba yokba ya World Help atema tongti mapa lir, ta ashi.

Alima tesem balala nung Khristantem reshikangshiba mita repringba telok, Open Doors-i ashiba agi, alima nung Khristantem alitsü tamajungtiba linükji North Korea lir.

International Bar Association & Committee for Human Rights in North Korea report nung ajemdaker Open Doors-i North Korea nung Khristantem mapang talanglang tepuokdak ayuba aser reshikangshiba osang metetdaksü.

Open Doors-i ashiba agi, North Korea nungbo Laishiba bena alibaji ozüng alema inyakba aibelen tuluka lir.

Osangbener den jembidang World Help Tir Yeatts-i, "North Korea densema alima tesem balala nung tang tashi Tsüngrem O (Laishiba) maliba ajanga World Help tenteta liasü. Onok tajemdakdakji ibaji lir," ta metetdaksü.

"World Help indang mission ji 'Tanü atema teyari; Asüng atema teimla' lir," ta laisa ashi.

"Chiyungtsü aser tzü tajemtsü den külemi asen temangi nüngdakba mozü melira tamang jenjangji kanga tila asütsü. Ajisüaka asen tanela chiyungtsü atema tamang melira ajakji mapang tatsüka atema dang asütsü. Kodang temang aser tanela naprong nüngdak nung rangloker inyakdir ibaji ajanga nisungtem taküm nung temelenshi adokdaksütsü. World Help-i ibaji kulisüa nguogo," ta lai ashi.

North Korea nungertem dangi Laishiba yokba den külemi parnoki kasa networks amshia North Korea nung chiyungtsü nüngdakbapurtem atema chiyungtsü-a yoker.

Yeatts-i, coronavirus wara sülen North Korea nung chiyungtsü agi kanga anünger, ta metetdaksü.

Coronavirus wara ajanga North Korea nung aluruwa mongpu nung linük tesem ajak lockdown süa liasü aser arrtsülen shibangba ajanga tanga linüktem nungi nüngdak balala bener marutet.

Yamaji timtem jenti liaka North Korea nung Khristantemi Tsüngrem O (Laishiba) atema

tzürar, ta lai ashi.

North Korea nung World Help indang partners-i, Tsüngrem O atema North Korea nung Khristantemi lendong ajurutsüa metsübur, ta ashi.

"Chiyungtsü agi anünga mapang nung süaka nai North Korea nungertem tamangertem dang Laishiba ka asü jang bag ka shimtsü, ta ashi nung parnoki Laishiba ang shimtsü," ta World Help partner-i metetdaksü.

Ajisüaka World Help-i chiyungtsü aser Laishiba naprongla agütsür; World Help-i North Korea nungertem nem Laishiba agütsüba dang masü saka parnok taküm libaliroa litettsüsa lenmang balala ajanga yariogo, ta Yeatts-i metetdaksü.

World Help-i alima tesem balala nung office amenoka mali saka linük balala nung partners yanglur linük balala sobaliba angatetba sülen yaritsü meranger, ta lai ashi.

World Help tentetba mapang nungi tenzüka tanü tashi nung World Help-i North Korea nung Khristan meyirjang aika nem Laishiba agütsüogo.

Temelungertem aser Arogotemi tenla agütsüba ajanga World Help-i mission mapa inyaker aser parnok indang website nunga parnoki Khristantem dang Laishiba kaka tenla agüjang aser North Korea nung Khristan ka hopta ka chiyungtsü atema tenla agüjang, ta mepishia lir.

Tawa World Help Tiri South Korea semdangba mapang nung lai North Korea nungi jena arurtem aser yimsü lenirtem kar ajurua liasü.

"North Korea nungbo meimchir temeden atema khenyongi mejembir. Parnoki meimchir temedenji tenarong agia mangashidanger," ta Yeatts-i ashi.

Yeatts-i Government of Liberty University nung Bachelor of Science renem. Iba University nung mezüng graduate asüsangji (1973 küm) tebu, Vernon Brewer liasü. 1991 küm tebui World Help tentet aser tang laia tebu tsüngsü nung jajar.

ANOGO ABEN TSÜNGREM DEN

Nüngtugu temoatsütem

Iba ken nung temepishiba kecha mali, tenüng asangba dang. Mezüngbuba temoatsüji tatok agütsüba (t.3). Ken züluri tatokbaji tanela nung anema aliba ta zülu. Asenok temsüa meliaka Tsüngremi asenok anebtsür, aser temoatsü ajak agütsübaji alangzükba lir. Temang nung tanebtsü kechi lir, tanela nung tanebtsüji tekümtet (tatok) ji lir. Yisu asenok Tanebtsür Tulu lir (Ef. 1:7).

Tanabuba temoatsüji alangzükba (t.4). Alangzükbaji kin ka alangzükba lir. Rut kaketi iba tatishitsüji sayur. Boaz kin ka alangzükba ka liasü. Tsüngremi wabanger aser moatsür, aser asenok kümzüka ayur. Pai asenok alar tia nungi tematiba jenjangi atsüket.

Tasembuba temoatsüji teperiba (t.5). Pai na tambur akümdang tajung agi tiptemdaksür. Tsüngremi agizüker aser tasen kümdaksür. Tanelaren asenok asangur/aiür kümdaksür, kechiaser asenoki Pa nung jangra atemer.

Na Tsüngremer tatok aser talangzükba kar ma? Yamaji süra, nai Pa metetba aser Pa O nung tashi angaba nungi aruba nung temulung süa pelaa lir ma? Nai tangar moatsütsü Tsüngremi na agizüker, tasen kümtsür aser moatsür.

Pope Francis-i China nung Khristantem atema sarasademtsüogo



Italy nung Pope Francis aser China nungertem chaplain tem tangokba noksa nung angur.

May 26, 2023: Pope Francis-i China nung Khristantemi sadoksadoka Khrista osangtajung lemsateptetsü aser sademsadema külemtetsü atema sarasademtsüogo.

Vatican aser China tsüngda tesendaktep tera mejungji aliba mapang nung May 24 nü China nung Catholic Arogo indang World Day of Prayer anogomong nung Pope-i China nung Khristantem atema jembu.

Vatican nung lokti den jembidang Pope Francis-i, "China nung Arogo aser loktiliba ajak nung süngjang tajung atangtsü, Khrista Kangki nung angenloka asüba aser tasü nungi shia aruba osangtajung sangdongtsü aser sademsadema külemtetsü atema Tsüngrem dang sarasademtsü ni ajak ayongzükba," ta metetdakja liasü.

Pope Francis-isa, "Ni China nung aliba asen adianutem aser aianutsürtem ajak dang parnok tejashi aser tepela ajak lemsatepa alima nung Khristantem parnok den lir ta metetdaksüner aser

reshikangshi jenjang nung alir pastor tem aser tamangertem nem tesüner den teimla ngudaksüner," ta metetdaksü.

2018 küm Vatican aser China sorkar nati China nung putirtem shimtsü atema Khristantem nem tashi agütsüba dak sendakba inyakyim indang tezüngzüktep ka agia liasü. 2020 küm iba tezüngzüktep maneni agi aser 2022 küm nunga kasa tezüngzüktep agia liasü.

Ajisüaka taküm April ita nung China nung ketdangsertemi Haimen nung Bishop Joseph Shen Bin, Shanghai-i transfer yok, aser ibaji Vatican den mejembitepi inyakba liasü.

Yaküm November ita nunga Vatican-i sangdong ka ajanga, China sorkari tezüngzüktep alema Yujiang nung Bishop John Peng Weizhao, Jiangxi nung auxiliary bishop shim, ta metetdakja liasü.

Jiangxi Arogo ya Vatican-i recognize masüba Arogo ka lir, ibayongji Vatican-i China sorkar aitsü.



Tribal Old Age Home cum Day Care Centre aser Mount Hermon School Darogajan lungjemer "Programmes to build intergenerational relationships between child, youths and Senior citizens" omen nung ajemdaker sentong ka ayongzükba liasü. Iba sentong nung Shange Kuponghu menden liasü, kong teintet rogotem aser kaketsürtem tem ken aser tsüngsang balala agi shilem agia liasü. Sentong nung Imlitongzuk Amri, Director, TOAHDCDC aser Kekhriesatuo Tep, Administrator, MHSD nati o tatsütsü jembia liasü.

**AO OSHI ANGAZÜKDAK:
TANÜ ANGAZÜKTSÜBA OJANG**



Rakden

(v) rakzüka ayu (extort)
* Tangar rongsen rakdena ayurbo atakatem ajurur.

Rakpok

(v) tashiyim agi lapok (break open)
* Aonung auertemi ozü jara rakpoka auya.

OLONG PAITEP # 6527

									1
2		3			4				
5				6			7		8
9			10						
		11						12	
							13		
14	15				16				
			17						

TIPIEN

- 2. Tetendangba - (8)
- 6. Ashiba metet - (7)
- 9. Asen / Saklok - (4)
- 11. Acha-ayanger - (7)
- 13. Tilutep - (4)
- 14. Yimli sayuang ta asungdang - (7)
- 17. Tetezü aketba pungmang - (8)

LANGTSÜNGLEN

- 1. As _ _ _ _ nshi - (4)
- 3. Putep - (5)
- 4. Tashi balaka - (3)
- 5. Iba küm - (5)
- 7. Alima nung malir dang ajaba - (4)
- 8. Komo temaitsü - (5)
- 10. Tapok - (4)
- 12. Tamajung aküm - (5)
- 15. S _ _ _ _ üwangshi - (4)
- 16. Jenjang aketba merang - (3)

OLONG PAITEP # 6526 TELANGZÜBA

TIPIEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem,
- 15. Tambu, 16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.

NAI-A YA METETTER MA



Alima rara tanabuba mapang British Royal Navy-i tanga sepaitem dang nungi jelia tsükchirtem armendanga atatsü atema yangluba 'defence forts' yangi noksa nung angur. Aji oda süaka, tangbo ibaji North Sea nung tzüma nungi feet ishika dang ajungketer mamshii yua lir.

Second 37 tsungda meputepi aliba 7 bushiang



**Guwahati nung
tzü pipe
pokdangba
bushisüngdangtsü**

Guwahati, May 26, 2023

(Agencies): Guwahati kübok Kharguli tesem nung Gammon JICA water supply main line pipe pokdangdang nisung ka asü aser 30 tema yiruba den ano teraksa jenti bentsür aruogo.

Iba tatalokba bushisüngdangtsü atema Assam Governor-i nisung aseme tentetba luden ka shimogo.

Sensotem kümzüka ayutsü nükjidong nung Governor-i iba tatalokba bushisüngdangtsü aser JICA indang Guwahati Water Supply Project indang safety audit asütsü tetuyuba agütsü.

Iba luden ya Secretary to the Government of Assam, Department of Housing and Urban Affairs Pabitra Ram Khaund, IAS lenisüba kübok asütsü. Luden nungsa Retired Secretary to the Government of Assam, Public Health Engineering Department cum Additional Mission Director (DEM) of AMRUT Ramendra Sundar Choudhury aser Retired Chief Engineer of the Irrigation Department cum Additional Mission Director (Admin) of AMRUT Sanjai Kr. Mahanta na lir.

Parnoki IOCL Gate anasa Joypur nung clear water pumping main pokdangba atema bushisüngdang asütsü.

Brihostibar nikongdang 3:00 ako meta Guwahati kübok Kharguli nung Gammon JICA water supply main line pipe pokdang. Tzü kanga ulura ayimba ajanga gari aika ponger ao aser ki 40 shi raksatsü.

Iba lendong ajanga nisung 600 kongshi aser nisung 30 tashi yirua lir. Ano Sumitra Rabha ta ser tetsür ka lendong nung asü.

Nisung telok kati Union Minister RK Ranjan'er ki amak

Imphal, May 26, 2023

(Agencies): Manipur nung mepetmesü adoka aliba mapang nisung telok kati tejashi nung Union Minister of State for Education and Home Affairs, RK Ranjan Singh'er ki amaksü merang.

May 25 aonung 9:30 ako meta Imphal East district kübok Kongba Nandeibam Leikai nung iba lendong atalok.

Ajisüaka, Manipur Police aser Rapid Action Forces (RAF)-i mapang shitak nung inyakba ajanga telok aziüktet. Iba mapang tenük amdaktsüba mokozü amshi aser tia kaa nisung yiruyibong asüba osang kecha maliasü.

Nisung telok kati union minister Singh'er telungi atu

KÜMREM PELAR



Mopungchuket Senso tajung Wb. Mangyangtemsu Aier aser Wt. S. Achila Jamir, tena jala **Kr. Renemsongla Aier** ajanga NEHU nungi Education Department kübok "Teachers' Burnout and Coping Strategies in colleges of Nagaland" onük nung Thesis renema Education nung Ph.D ngutetba atema asen Sodangchang Aier Semchirtemi kümrem pelar aser Tsüngrem nem tenüngsang tulu agütsür.

Iba mera tulu ajanga asen lima aser nüburtem tajangzük tulu angutsü teimla tulu akar aser ne wadang nung Tsüngrem leniba maneni dendakjang ta sarasademtsür.

**Office of the
LONGJANG MEDEMSANGER PUTU MENDEN
(Longjang Village Council)**

TENÜNGSANG AGÜTSÜR

Longjang Medemsanger Putu Menden ajanga Govt. High School Longjang nungi HSLC exam nung takok anguba kaketshir nem tejak tenteta konang tetushi agütsür. Nenoki takok ngutetba atema temolung taroktiba nungi pelaba lemsateper aser Head Master, tesayur aser tsürabor temi meranga sayuba aser anepaluba atema tenüngsang agütsür.

Govt. High School Longjang nungi küm trok atonga pass percentage noklang nung noklang shilem ngutetba asoshi council kanga pelar.

Ano HSLC aser HSSLC examinations 2023 nung takok anguba kaketshir ajanga nem Putu Menden ajanga tenüngsang agütsür. Tarutsü anogotem nunga Tulusang Tsüngremi nenok aniang ta sarasademtsür.

**Sd/-
Imti Aier
Chairman
Longjang Village Council**

**Sd/-
Alemtemjen Jamir
Secretary
Longjang Village Council**



**OFFICE OF THE
WAMEKEN SENSO MONGDANG**

**B.P.O Wameken – S – 1014
District. Mokochung, Nagaland-798618**

TENÜNGSANG AGÜTSÜR

Wameken Senso Mongdang office ajanga Senso tajungtem shirnokisa mapa aser tazungba nung Senso Sanger dangi tenüng tajung bener arutsüogo, Sensosanger tenüng nung nenok ajak den kanga pelaba lemsateper.

- 1. Miss. Imnasenla M Longkumer, D/o. Mr & Mrs. Er. N. Moa Longkumer HSLC 2023 Exam nung Top 18th Rank anguba.
- 2. Mr. Sentilong Jamir S/o. Mr & Mrs. P. Tako Jamir SSC Exam ajanga Sub-Inspector (BSF) post anguba.
- 3. Er. T. Meren S/o. Mr & Mrs. Chubamanen, North Eastern Electric Power Corporation Ltd. (NEEPC). Nung Deputy General Manager (E), promotion anguba
- 4. Mr. Imlimeren Imsong S/o. Mr & Mrs. N. Imti Imsong, Nagaland University, Lumami nung Assistant Registrar, promotion anguba.
- 5. Er. N. Moa Longkumer S/o. Mr & Mrs. Nuklungangshi, Administrative Training Institute Kohima, nung Joint Director, promotion anguba.

Tarutsü nunga Tsüngremi nenok taküm aser wadang tali moajangma.

**Sd/-
LANUMOA, President**

**Sd/-
SENTITOSHI, Gen. Secretary**

asere anepdang 12:30 ako nungi

1:00 ako tashi liasü. Iba tensa aziüoktsü atema state aser central forces aika aru aser nisung ka apu saka chiok, ta Irilbung Police Station ketdangtsür kati ashi.

Iba mapang RK Ranjan kidang liasü ta pa indang private secretary kati ashi.

Pa tawa Imphal-i aru aser tanep Delhi-i ogo. Pai Kuki aser Meitei nung lennirtem aser ano civil society organizations den ajurutepa yimjung bener arutsü atema jembiogo ta private secretary-isa metetdaksü.

Yasüng iba lendong matalokdang Union Minister-i 8:00 ako meta nisung telok ka den ajurutepa sensaksema

liasü.

Iba sülen aonung 10:00 ako meta nisung 300 nungi 400 shi kati par ki amak saka mapang shitak nung security forces aruba ajanga tensa aziüktet.

RK Ranjan ya BJP lennir ka lir aser Inner Manipur Lok Sabha constituency nungi MP lir.

Bodbarnü Bishnupur district nunga nisung telok kati Manipur PWD Minister Konthoujam Govindas'er ki amak.

Govindas ya BJP lennir ka lir aser iba lendong atalokdang pa aser par kinungertem kidang maliasü.

Ningthoukhong tesem nung tetsür teimba ser nisung telok jagi Govindas'er ki amak.

Tzü-mopung menenba agi küm 50 tsüngta nisung million 2 süogo

Geneva, Monupii/May 26 (Agencies): Tzüngsang mopung kanga tesashi aruba ajanga tesüiba küm 50 tsüngta nisung million ana takum samaogo aser rongsenketzüng sen trillion \$4.3 jenjang akoksaogo, ta United Nations ajanga bushitet.

UN indang World Meteorological Organisation (WMO) nungi Hombarnü sangdong nung ashiba agi, 1970 nungi 2021 tsüngta tzüngsang mopung dak sendakba lendong 11,778 ben ataloka liasü aser iba mapang tali tamajungba akum.

Alima nung iba ama lendong nung asüba ya shilem 90 dak tema developing countries tem nungi lir, ta ashir.

"Tzüngsang mopung, tzü-mopung aser tzü dak sendakba takoksa ya timba tepetzük tia nung alirtemi ajangshir," ta WMO chief Petteri Taalas-i sangdong ka nung ashi.

Taoba hopta Myanmar aser Bangladesh nung kongshiba Cyclone Mocha ya iba indang tatishitsü asangsang nung lir, ta Taalas-i ashi.

Yipru tesashi agi takoksa tulu bener arutsü aser makamaiter

tem ang tali tim atemer," ta pai ashi.

Ajisüaka 'early warning system' tajungba akumba aser osang agitepa lendong timtem ketdangsuba ajanga nisung asü-amaba kanga ajemogo, ta WMO ajanga ashi.

Taoba mapang Mocha ama teraksa lendong atalokdang Myanmar aser Bangladesh nung nisung meyririjang aika süogo, ta Taalas-i ashi.

Myanmar mitkar indang sorkari tang tesüsa aruba cyclone nung asür nisung 145 lir ta ashi saka iba dang timba süa alitsü ama amanger.

1970 nungi 2019 tsüngta alimar lendong dak sendakba nung asü-amaba aser takoksa ajuruba indang osang ka 2021 küm agütsüdang alima nung küm shia nisung 50,000 dak tema asüba angur, ta parnoki shia liasü. 2010s mapang iba ama lendong nung asür ya küm shia 20,000 dang tajemba liasü.

Aser alima nung 2020 aser 2021 tsüngta alimar lendong balala nung asüba nisung 22,608 liasü, ta WMO ajanga Hombarnü ashi.

"Kera tekum dangtsü osang

sangdongba aser lendong timtem mapang junga ketdangsuba ajanga asü-amaba kanga ajema kumogo. Tekeraba nung tekum dangtsü sangdongba ajanga takum kumzüker," ta report ajanga ashi.

2027 küm tatem tashinung linük ajunga nung 'disaster early warning systems' alitsü asoshi UN-i sentong ka tenzüko. Tanü tashinung alima nung linük tesadang ka nung dang iba amala system ya lir.

Asü-amaba ajema kumaka rongsenketzüng tsütsü takoksa tali akumer, ta WMO ajanga ashi.

1970 nungi 2019 tsüngta alimar lendong nung rongsenketzüng tsütsü akoksaba asadanga mezüng küm ter tsüngta anogoshi sen million \$49 shi akoksa liasü aser tatemlen anogoshi sen million \$383 akoksaba asadangteta lir.

Rongsenketzüng tsütsü takatait linüktem nung tamajungba kongshi.

Tzüngsang mopung, tzü-mopung aser tzü ajanga takoksa bener arutsüba ya shilem 60 dak tema developed country nung lir, ta ashir.

TENÜNGSANG AGÜTSÜR



Taoba mapang Christian Higher Secondary School nung zünga alir aser HSSLC 2014 rank holder **Imkongnukla Ao-i** UPSC 2022 Examination nung takok tulu ngutetba asoshi Christian Higher Secondary School ajanga tenüngsang agütsür.

Nisung aikati nüdak nukshia rangloker. Mapa tajung maneni inyang! CHSS ajanga nü tarutsü wadang asoshi tajungtiba moajang ta sarasademtsür.

S. Moatemu Walling
Principal, CHSS

LONGRASETER



S. WATILA LONGKÜM TSÜR, MOPUNGCHUKET.
(15th Dec. 1938 - 27th May 2022)

Avo, na mali küm ka süiba ya küm meyi ka ama anogoshia mebilemli asüyonga tali tang longraa bilemer. Nü temeim, menürem jakten, mapa agi kotanga malakla, teyarinü, tejungnü, tagütsünü aser nai onok asoshi teti sarasademtsüba nuklai arua longrasete aser onok mulungjang süneptsür.

Nai doktsür aoba temeim kinüngerem, adianutem, semchirtem, medemsortem, tanü na longraa sarasadema amonger.

NA SENTI TANELA TETI TATEM MAKADAK KIBUBA DEN TEPELA NUNG ANISÜNGZÜKA DOKJANGMA.



Office of the
Managing Board
BAPTIST HIGHER SECONDARY SCHOOL
MANGKOLEMBA
P.O.: Mangkolemba - 798604, Nagaland

TENÜNGSANG TULU AGÜTSÜR

Managing Board Members ajanga Miss. Sungtiben Kichu D/o. Mr. Imlitemsu Kichu & Mrs. Imlinaro aser Miss. Temsumenla Jamir D/o. Mr. Imzamokba & Mrs. Temjenlila nati 17th aser 20th rank HSLC 2023 tatidang nung takok khonang nüngsang tulu School nem bener arutsüba asoshi temulung taroktiba agi pelaba lemsateper.



Sungtiben Kichu 17th Rank



Temsumenla Jamir 20th Rank

Board Members aser School-i HSLC aser HSSLC nung takok kwi kati nguogo nenok ajak dang pelaba den tenüngsang agütsür. Tarutsü anogotem nung nenok shisatsü Tsüngremi moajangma.

Principal
Baptist Hr. Sec. School
Mangkolemba

Chairman
Managing Board
Baptist Hr. Sec. School
Mangkolemba

2024 US Tir election nung tokteptsü DeSantis tenüng agütsüogo

Washington, Monupii/May 26 (Agencies): United States nung 2024 küm tir election nung shilem agitsü asoshi Florida Governor Ron DeSantis Bodhbarnü tetsüng ajemokogo, anungji Republican telok nungi tir inyaknür jenti alidak densemer, kong taoba tor Donald Trump densema lir.

Arishi küm 44 tain Republican telok nungi DeSantis-i teletetba agiba osang ya Twitter CEO Elon Musk den online ajanga sensaksem masüdang Federal Election Commission nung tenüng agüja temai adok.

Ibai junga memetetü congress züngsem inyaka aruba nungi kümsük ana tashi governor inyaka linük nung race, gender, abortion aser danga ken o tamajung anema linüki raraba nung lenir ka akum. DeSantis ya Republican telok rongnung Trump den tokteper tesashitaba asütsü südi

ta züngshir.

DeSantis-i audio kisüng nung sangdongba ya Twitter Spaces nung nikongdang 6:00 ako (par mapang) nungi tenzüksü liasü.

DeSantis-i Republican telok nungi US tir atema tokteptsüba ya ita aika olulu jembia aru ase Democratic party nungi Tir Joe Biden ket nung White House tanaben agitsü bushiba tsütsü candidate tashi tait ka ama züngshir. Arishi küm 80 tain Biden-i linük ya left tsütsü tali nung ogo aser osettsüset nung jenjang atuba, immigration aser mapa tamajung inyakba mazüokteter, ta Republican temi ashir.

2024 küm November ita general election nung Republican telok nungi shiba shimtetdir pa/lai Biden den tokteptsü.

Trump teyari medeni DeSantis ya Florida indang governor mekumi lila, aser pa

yimya-koya nung taoba tir mesüker.

Trump ya ken o aika agi meketbanger lir asünung, DeSantis ya jenjang tajungba amai bilemer, aser Trump'er telokia tetsükdaktsü tulutibaji DeSantis ya asütsü ama bilemer.

Florida nung DeSantis ya kanga nungtugu lir, saka danga state temi pa junga memetet.

Florida nung alir DeSantis kibong ya Midwest nung tera yanga lir aser pa Yale University aser Harvard Law School tem nung azüng.

Republican telok nungi US tir inyakner rongnung Trump, taoba UN Ambassador Nikki Haley, South Carolina Senator Tim Scott, taoba Arkansas Governor Asa Hutchinson aser biotech entrepreneurs Vivek Ramaswamy nungertem dena lir. Taoba US tatong tur Mike Pence-ia tokteper amai lir saka tang tashi sangdonga mali.

Taoba Pakistan PM Imran Khan linük alema aotsü memelar

Islamabad, Monupii/May 26 (Agencies): Pakistan mitkar den mangatetep adoka aliba mapang sorkari taoba ato kilonser Imran Khan, pa kinungtsü aser yimdenren nung teyariteper nisung noklang aiba bendang limai aotsü nokdang, ta ketdangtsür temi ashi.

Immigration aser arütsü aziöker Federal Investigation Agency (FIA) ajanga 'no-fly list' nung Khan tenüng inokogo, ta ketdangtsür anati Hokulbarnü ashi.

Khan kinungtsü Bushra Bibi, par Pakistan Tehreek-e-Insaf (PTI) party lenir aser züngsem 500 dak tema iba list

nung inokogo, ta ketdangtsüri ashi.

"Ken o ajak nung iba yimya ya amshir. Okadak ken o jembitsü alirtem shinga linük alema meyoker," ta ketdangtsür kati ashi. Sorkari no-fly list nung pa inoktsüba atema Khan-i Hokulbarnü pelaba lemsatepa liasü.

"Ni bendang limai aotsü sentong mali, kechiaser bendanglen ni rongsen mesüra business mali aser bendang lima nung bank account kata mali," ta pai Pakistan nung tang yimsü tesüdak yimden yimsüsür dak tulukja ashi, shirnok bendang lima nung ki lir ta ashir.

2018 aser 2022 tsüngta Khan indang sorkaria opposition lenir aika linük alema aoba nokdanga liasü.

May 9 nü arishi küm 70 tain Khan apuba anema pa bukumer temi army headquarters densema mitkar aliba tesemtemi ia timtem agüja ki o jen raksatsür hopta ishika lir tang Khan anema tenokdanga ya agütsür.

Iba sülen PTI nungi taoba mapang legislator ter dak tema Khan nungi pilaogo aser PTI lenirtem aser osangbener densema pa bukumer nisung 4,000 dak tema apu.

(Maneni tapak 8 nung...)

NFA-i MLA Lamthiu nem tenüngsang agütsü



Hokulbarnü Nagaland Football Association (NFA) ajanga par association tongti zülur Benei M. Lamthiu nem tenüngsang agütsüba sentong agidang tangokba noksa nung angur. Lamthiu ya 57-Thonoknyu Assembly Constituency nungi 14th Nagaland Legislative Assembly nung MLA lir.

Kohima, Monupii/May 26 (TYO): Nagaland Football Association (NFA) ajanga Hokulbarnü par association tongti zülur Benei M. Lamthiu nem tenüngsang agütsüba sentong ka agia liasü. Lamthiu ya 57-Thonoknyu Assembly Constituency nungi 14th Nagaland Legislative Assembly nung MLA lir.

Iba sentong nung jembidang Lamthiu-i ashiba agi, saisapongtsü jangraba nungi football club ka nung manager inyaka NFA nung tongti zülur inyaka yimten yimsüsür akumba ya temela masü.

14th NLA nung züngsem akumdang NFA aser sendaktepa alirtemi yariba

atema pai pelaba lemsatepa liasü.

Tarutsü nung Assembly züngsem akumtsü asoshi lanurtem aser saisapong meimer tali adoktsü imlar aser ajak senteper state nung football aser saisapong tajungba kumdaktsütsü merangtsü, ta ashi.

Lamthiu-i otsü tasen ka yanglua NFA office nung lia NLA nung züngsemstsü shim, ta NFA tir K. Neibou Sekhose-i ashi.

Bendanga agütsür meranga inyakba, nükla akaba aser mera tajung agiba ajanga pai jenjang tajung ajangzük, ta Sekhose-i ashi.

NFA Head of Referee, Kevingutuo Sekhose aser

Nagaland Football Coach Association tir Roko Angami natia Lamthiu nem tenüngsang agüja liasü.

February 27 state general election nung takok anguba asoshi district football association balalai Lamthiu nem tenüngsang agüja liasü.

Iba sentong nung NFA senior vice president Kiyeka S. Sumi menden liasü aser Director, Gethemgo Sports International, Dr Viposa Kiso ajanga sarasadem aser NFA vice president Mughato Aye ajanga melepzüng o jembia liasü. Iba sentong nung Keneisenueo Sorhie ajanga temeja ken ka aten aser iba sentong tembangba sülen NFA inty mungdang agia liasü.

Olympic Day Run nung NOA nungi shilem agitsü

Dimapur, Monupii/May 26 (TYO): Nagaland Olympic Association (NOA) ajanga sangdong ka nung ashiba agi, taküm June 24, 2023 nü Indira Gandhi Stadium, Kohima nung "Let's Move" omen nung ajemdaker

- 1. 30 Meters : 4years and above - below 6years (Born after 1st June 2017)
- 2. 50 Meters : 6years and above - below 9years (Born after 1st June 2014)
- 3. 80 Meters : 9years and above - below 13years (Born after 1st June 2010)
- 4. 100 Meters : 13years and above - below 16years (Born after 1st June 2007)

NOA ajanga tsürabor, kinunger, school aser saisapongtsü jangrartem dang pei tanur ajungshia iba sentong nung shilem agidaktsütsü ayongzuka liasü.

Olympic Day Run nung lanurtemi shilem agiba ajanga temang anema yutsüba kisung masü saka saisapong ajanga tesendaktep tajung aser telungjem adokdaktsütsü.

Takok angur nem ajak senteper senpet sen 50,400 den Nagaland Olympic Association nungi merit certificate agütsütsü. Shilem agir shia nem International Olympic Committee nungi kulizüng kaket agütsütsü.

Olympic Day Run nung shilem agitsü asoshi registration ya arishi küm 4 nungu 16 tsüngta tanurtem ajak asoshi angati alitsü. Registration atema June 18, 2023 ya tatem anogo asütsü.

Tenüng zülüoktsü asoshi

Olympic Day amungtsü.

Taküm iba sentong ya arishi küm 4 nungi 16 tsüngta tanurtem aser lanurtem ajungmesotsü aser takum libaliru yimya saksalema, sportsmanship ajungketa

anogo matemdang NOA office, Kohima nung oa agitetsü mesüra online ajanga <https://forms.gle/CkuLsBhyQGyHxWrT6> nung agitetsü.

Iba dak sendakba nung

Olympic spirit benjongtsü nükjidong nung iba anogomung ya amungtsü.

Iba sentong nung category balala nung arishi küm balala lemsar asemtepa alitsü aser itemji yamai alitsü:

osang tali tejangjaba metettsü asoshi Nagaland Olympic Association, Kohima office den Neivikuolie Khatsu - +91-8259-023-640 aser Kajiiloni Krichena - +91-7085-333-972 ajanga jembitsü akok.

Taoba Pakistan PM Imran... (Tapak 7 nungi...)

Mitkar amenoka aliba tesem amaker tem mangatetep aliba military court tem nung ken o jembitsü ta sorkari ashir, koba linük aser alima nung rights group temi aitsür.

Tan ita azüdokshia longkak aitba nung shilem agia lir ta temolung melemi alir civilian 16 Lahore yimti nung aliba anti-terrorism court kati mitkar nem Brehostibarnü agütsüogo.

Ano linük tesem balala nung armed forces tem yoka aliba ajanga Khan-i Brehostibarnü Supreme Court bushia ao aser ibai "undeclared martial law" ka lir, anungji tim masüba mera ka

lir ta linük nung tematiba court dang sangdongtsü mepishia liasü.

May 9 nü rongrongshirong mechi Punjab, Balochistan aser Khyber Pakhtunkhwa province tem aser linük yimtiba, Islamabad nung army yoka lir.

Khan'er party nokdangtsü asoshi onük benoka lir ta sorkar minister temi ashi, koba ajanga linük nung mepetmesü tali ang adoktsü.

Taoba küm April ita yimsüsüba menden nungi atsüngdokba sülen Khan-i general election tekeraba nung agiang ta jembia jajar, koba taküm October ita agitsü lir.

AZ Alkmaar-i nisung 43 stadium-i arutsü memelar

Alkmaar, Monupii/May 26 (Agencies): Europa Conference League semi-final asayaba sülen samara nisung kari West Ham fans dak teka sangshiba mechi Dutch Eredivisie nungi AZ Alkmaar ajanga nisung 43 stadium-i aruba nokdangogo.

West Ham asayar kinunger aser medemer aser ketdangsür atema wazükja aliba tesemi AZ fans tem May 19 nü aita liasü.

"Taoba hopta meinprongba mechi AZ ajanga nisung 43 stadium-i marutsü tenokdangba agütsüogo. Iba Alkmaar nung European semi-final asayadang tim masüba mapa inyakba indang lir," ta club ajanga Brehostibarnü menur sangdong ka nung ashi.

Iba tatalokba dak sendakba nung Dutch ketdangsür temi bishisüngdang tenzükogo, ta

club ajanga ashi. Iba tatalokba dak sendakba nung Dutch police temi nisung 14 pua lir.

Deobarnü PSV Eindhoven den asayatsü lia tim ketdangsür den mera balala atema jembishinü sūdaki, ta AZ ajanga ashi.

Tebilemba tajung aliba AZ bukumer meyrirjang aikati asaya tajung reprangtetsüla, ta ashi.

Pablo Fornals-i asaya tatemtsü lia goal ka agüja 1-0 agi takok anguba sülen rongrongshirong ya adok. Iba takok ya ajanga West Ham ya küm 47 nung European final nung mezüngbuba asayatsü lir.

West Ham manager David Moyes-ia par kinunger asoshi shisaboloa bilem ta ashi.

Netherlands nung football asayaba mapang lendong balala atalokba taküm tali akumer.

Malaysia Masters: PV Sindhu semi-final tongogo



Kuala Lumpur, Monupii/May 26 (Agencies): Hokulbarnü Malaysia Masters Super 500 tournament (badminton) tetsür kija asaya nung India tsür PV Sindhu-i China tsür Yi Man Zhang madak takok ngua semi-final tongogo.

Olympic medal anaben ngua alila Sindhu ya tournament nung seeded trok buba nung lir aser quarterfinal ghonda ka ser minute 14 asayaba nung Zhang madak 21-16, 13-21, 22-20 agi koka liasü.

World number 13 nung alila Sindhu-i küm tetenzüklen All-England Open indang round 32 nung Zhang-i tsükdaktsüba mang yanga liasü. Lai China tsür la ya taoba küma kasa asayamung nung tsükdakja liasü.

Honibarnü semi-finals nung Sindhu yagi seeded tenet nung alila aser world number 9 nung alila Indonesia tsür Gregoria

Mariska Tunjung den asayatsü. Tunjung-i quarterfinals nung China tsür second seeded Yi Zhi Wang 21-18, 22-20 agi tsükdakja liasü.

Tawa Tunjung ya form nung lir aser April ita Madrid Spain Masters final nung Sindhu ya straight games nung tsükdakja liasü.

Ajisüaka Sindhu aser Tunjung na ti ben ajurutepeba nung Sindhu-i tenet ben aser Tunjung-i khen koka lir.

Kasa asayamung tebur kija asaya quarterfinals nung India nung Kidambi Srikanth ya Indonesia nung Christian Adinata-i 21-16, 16-21, 11-21 agi tsükdakja liasü. Tena tsüngta minute 57 asaya liasü.

Maneni Hokulbarnü India nung HS Prannoy-i tebur kija asaya quarterfinals nung Japan nung Kenta Nishimoto den asaya 25-23, 18-21, 21-13 agi takok ngua liasü.

BILEMDANGANG

"Anü tsütsü tejak shira nü tanüla mangutsü."